

# Il Prix Montagne va a Muotathal

Il territori da muntogna è innovativ

DA LUCAS DEPLAZES / ANR

■ **Ils pioniers da turissem en il Muotathal han retschavi ier a Berna il Prix Montagne dotà cun 40 000 francs. Tar ils projects en rangaziun è er stada la sennaria da Nufenen.** Cun vesavel plachair ha il mainafatschenta da «erlebniswelt muotathal» Muotathal/SZ retschavi il Prix Montagne 2012 or dals mauns dal president da la giuria, *Bernhard Russi*. Il Prix Montagne vegn surdà dapi l'onn passà da l'«Agid Svizzer per la Muntonga» e da la «Gruppa svizra per las regiuns da muntonga SAB». Or dals chantuns Grischun, Vallais, Tessin, Sviz e Vad èn stads inoltrads 15 divers projects innovativs. La giuria ha selecziunà sis per il Prix Montagne. La Quotidiana ha preschentà ils sis projects en sia ediziun dals 23 d'avust 2012.



**Bernhard Russi surdat il Prix Montagne als pioniers da turissem da Muotathal.**

FOTOS L. DEPLAZES

## Ideas innovativas sa pajan

Sco quai ch'il president da la giuria, Bernhard Russi, ha punctuà a chaschun da la surdada dal Prix Montagne a Berna datti nagins sperdidiers. Tut ils projects inoltrads han caracter da model, ha Russi sincerà. En quest senn hajan era tuts guadagnà e fetschian ina buna reclama per lur territori tar in vast public. Tals pro-

jects sajan adattads per promover novs impuls. Ils projects demussian che la populaziun da muntogna prendia senza enta maun ses problems actuals e realischia agens concepts. Talas iniziativas pon augmentar las entradas dals abitants da las muntognas ed impedir ch'ils giuvens bandunan il territori muntagnard. La schelta na saja betg stada simpla per

la giuria, ha constatà Russi. Mo la finala ha il project da Muotathal persvas il gremi.

## Dieschmilli giasts

Il project «erlebniswelt muotathal» en il chantun Sviz haja carmalà l'onn passà 10 000 giasts en il Muotathal. Tut en tut han ins organisà 800 turas guidadas cun chauns da schlieusa. Suentar las turas vulan ils giasts era star sur notg e giudair las spezialitads da la regiun, han punctuà ils responsabels dal project che exista gia dapi 14 onns. Da quest project pon er profiter ils manaschis locals che vegnan resguardads consequentamain dals organisaturs sco per exempel la sennaria dal vitg che haja furnì l'onn passà 500 kilos chaschiel per far fondue.

## In grond success er per Nufenen

Tranter ils sis projects che han retschavi in premi sa chatta er la sennaria a Nufenen (GR) che producescha chaschiel da muntogna. El saja fitg satisfatg dal grond success da l'acziun Prix Montagne, ha confermà *Christian Simmen* envers l'anr. Per il manader da fatschenta

da la sennaria a Nufenen munta questa distincziun in segn da reconuschienscha e dat a l'organisaziun nov anim. La muntada da la sennaria saja essenziala per la populaziun da Valragn. Ensemen cun ils 21 manaschis da purs sajan var 120 persunas dependentas directamain da la chascharia. Las spezialitads da muntogna hajan tshert ina buna schanza sin la fiera liberalisada sco product da nischa. Necessari saja dentant in agen marketing, separà dals producents gronds. Nufenen dispona d'agens channels da vendita, da persunal cun grond engaschi e che vul muventar insatge, ha punctuà Simmen. La sennaria a Nufenen producescha var 120 tonnas chaschiel l'onn. Bel e bain la mesadad dal chaschiel da muntogna bio da la marca «Via Mala» surpiglia Emmi, var 30 tonnas u 6000 magnuccas van en la Germania. Products da muntogna hajan tshert in avegnir, è persvas Simmen.

Er l'onn 2013 prevesan la SAB e l'Agid svizzer per la Muntonga da surdar in premi per ideas innovativas. La concurrenza vegn publitgada la primavera proxima.



**Bernhard Russi (amez) surdat in premi da distincziun als exponentes da la sennaria da Nufenen: Hans Rudolf Heinimann (san.) e Christian Simmen (dretg).**